

2 PEDRO

Pedro queédih ã túyat tútat

¹ Weém, Pedro, Jesucristo ã naáwát tútuni, caandíh teo wãhnibut jumna, yeebdíh wã jwáub daác wahna caá. Jesucristo jwiít dih túi ubni, Dios ã jumna caá. Caán yoobóp dih chãjni jumna,* jwiít nihatdih oinit, ã teo wáacachah, biíc yoobó caandíh jepahnit jwí jumna caá. Pánih jepahnit, jwiít nihat biíc yoobó ãihwã jumna, caandíh búdí jwí wẽina caá. ² Diosdih, jwí Maáh Jesúsdi hbut ñi túi jéihyechah, yeebdíh búdí oinit, ã teo wáaca naáh, ñi túi jummat pínah niijná.

Nin pah Cristoíhwã ã jummat

³⁻⁴ Dios túini, nihat jéihni jumna, jwiít dih ãt ñíwip wat jĩ, ãihwã jwí jummat pínah niijná. Páant ã ñíwatdih jéihna, caandíh jwí túi jepahna caá. Páant jwí jepahachah, ã wēpatjĩh jwiít dih búdí ã teo wáacipna caá, caandíh jéihnit, túi chãjnit jwí jummat pínah niijná. Dawá túini naáwát nadih jwiít dih ãt naóh jip tagaá, ã jummat pah jwiít but jwí jummat pínah niijná. Páant ã naáwát jidih ñi túi joyóchah, ã wēpatjĩh Diosdih jéihcannit yeejépdih ã en ñinahat pah chãjcan, yeéboó ã náhat pahjeh túi chãjnit ñi jum b ipna caá. ⁵ Pánihna, Cristodih túi jenah joinít jumna, túi chãjnit but ñi jumnaá. Pánih jumna, Dios naáwát dih ñi túi míc bohénaá, ded pah yeebdíh ã náah yacat pínahdih ñi jéihyat pínah niijná. ⁶ Dedé yeejépd chãjíhatdih yap yohnit, Dios ã náhatboodíh

* **1:1** Tit 2.13

chājnit ñi jumúú. Pánih jumna, dedé yeejép yeebdíh ã yapachah yuhna, biíc yoobó túi chājnit, Diosdih wēina, ã náahat pah chājnit ñi jumúú. ⁷ Pánih jumna, biíc weh pah oinit, túi míic teo wáacnit, nihat bitadihbut túi oinit ñi jumúú.

⁸ Det pánih jumna, yeó jáap jummat pah Cristo ã weñat pínahdih túi chājnit, caandíh chah í túi jenah joibípna caá. Pánihna, Cristodih í túi jenah joyát, bitadih í teo wáacatbut oboh jumni nihcan níit. ⁹ Obohjeéhtih, det pánih chājcan, túi jéih encannit panihnit, Dios naáwátidih túi jéihnit nihcan caá. Cristo í yéejatdih ã yohatjidih quíib buúdnit í jumna caá. ¹⁰ Wã déewã panihnité, áihwã ñi jummat pínahdih Dios yeebdíh ã ñíwichah, ñit túi jepahap taga. Pánih jepahnit jumna, caandíh túi jenah joí cádahcan, ã náahat pah ñi túi chãjaá. Pánih chãj cádahcan, yoobópdi h ã ñíonit jumna, páantjeh Diosjeéh ñi jummat pínahdih ñi túi jéihbipna caá. Pánih jéihna, yeejép chājnit nihcan, ¹¹ jwíitdih túi ubni jwí Maáh Jesucristo ã jumupna ñi túi juibíbipna caá. Pánihna, áihwã yoobát ñi jumuchah, yeebdíh ã wēi jwãáhbipna caá, páantjeh ã maáh jumupboó ájeéh ñi jummat pínah níijná.

Á bohéátjidih ã náhniat tútat

¹² Yeebdíh wã bohéátjidih túi jéihnit, nihat Dioíh doonádih ñi joyátji pahjeh ñi túi chãjna caá. Páant ñi chãjachah yuhna, caandíh wã jwúub náhniabipna caá. ¹³⁻¹⁴ Wã wunat pínah bahnijeh ã jedhdadidih jwí Maáh Jesucristo weemdíh ã jéihyanap be. Páant ã jéihyanachah, wã báadh jwuhna, wã bohéátjidih yeebdíh wã jwúub náhniachah, ã túina caá. ¹⁵ Pánihna, nin núodih yeebdíh wã daác wahna

caá, wã buudát túttimah nihat wã naáwátjidih ñi túi náhníat pínah niijná.

Cristo ã wēpat

¹⁶ Cristo ã wēpatdih, ã jwúub dei jūúwát pínahdihbut yeebdíh naóhna, cãacwã ï jengah joiní naáwátnejeh naóhna jwí chãjcap be. Obohjeéhtih, jwiít ã bohénitjiboó wēpni ã jummatdih jwiítjeh jwí enep jĩ. ¹⁷ Jwí íp Diosboó Jesucristo chah wēpni ã jummatdih jwiítidih ã júutachah, búdí yeh iigát cãtíh ã ñuhup jĩ. Páant ã ñuhuchah, Dios nin pah ái wēp niijíp jĩ: “Nin wã wūúh, wã oini caá. Caandíh búdí wã wēina caá”, ái niijíp jĩ. ¹⁸ Dios ã jumni jeejíboó jwiít Jesúsjeéh jumnit, jeámant páant ã niij yáanachah, jwiítjeh jwí joyóp jĩ.*

¹⁹ Pánih caandíh ennitji jumna, Dios naáwátidih naóh yapanitji ï daacát yobópdi h ã jummatdih jwí túi jéihna caá. Páant ï daacátjidih míic bohénit, ñi túi jepahaá. Nin baácdih moón Diosdih jéihcannit dupúát panhipboó ï jumna caá. Nin dupúnapboó jum jwuhnit, jon jãtíh ï daacátjidih ñi túi bohénachah, jiiát panihni yeebdíh ã túi jéihyabipna caá. Cristo jwúub dei jūóhna, ã íp ded pah ã jummatdih ã túi jéihya beedábipna caá. ²⁰⁻²¹ Nin wã naáwát pínahdih ñi túi beh joyoó: Dios naáwátidih naóh yapanitji ï jengah joyátjìhjih ït daácjican tagaá. Obohjeéhtih, Túini Espírituboó queétdih ã naáwát túutat pahjeh ït naóh daácjip taga. Pánihna, ï daacátjidih jwiítboó jwí jengah joyátjìhjih bohéna, “Nin pah niijná caá ã chãjap”, jwí jéih niijcán caá. Túini Espiritu ã teo wáacatjìhjih jwí jéih beh joiná caá.

* **1:18** Mt 17.1-5; Mr 9.2-7; Lc 9.28-35

2

Yee bohénit ded pah ï jamat

¹ Jon jãtìh jwĩ déewã judíowã yuhna, biquína “Dios naáwãtdìh naóh yapanit caá”, niíj yeenit ït jamap wat jĩ. Pãant ï jamatji pahjeh muntih, buubut ñijeéh jamnit biíc yoobó yeenit ï jambipna caá. Queét yoobópdiìh bohénit pah jamna yuhna, ï yee bohébiìpna caá. Pãnih bohéna, Cristoìh túini doonãdìh ï yéejabipna caá. “Cristo ã túi ãbnit jwĩ jamna caá”, niijnã yuhna, “Caán jwĩ Maáh caá”, niíj jenah joicán, ã watatdìh ï jepahcan niít. Pãant ï yee bohéat jíib, waícanjeh Dios queétdìh peéh chãjnit, iiguípna ã wahbipna caá. ² Pãant ï yee bohénachah joinít, yeejép ï chãjat pah muntih, dawá Jesúihwã biíc yoobó yeejép ï chãjbipna caá. Pãant yeejép ï chãjachah ennit, bitaboó túini doonãdìh yeejép ï wéhebipna caá.* ³ Dawá bií déedih náahna, ï bohéat jíib búdí jíib waadánit, ï jenah joyátjìhjah yeebdíh ï yee bohébiìpna caá. Pãant ï yee bohéatji jíib Dios jon jãtìh queétdìh peéh chãjat pínahdìh ã jenah joyát pahjeh, iiguípna ã wahbipna caá.

⁴ Jon jãtìh Dios yeejépwãdìh ã peéh chãjatjìdìh ñi túi náhninaá. Caandíh jepahcannit ángelwã ï jepahcatji jíib, iiguípna yohnit, dupúni tólihboó queétdìh ãt nemep wat jĩ. Pãnihna, péeni yeó jáapdiìh queétdìh búdí ã peéh chãjbipna caá.* ⁵ Pãnihat pah muntih, Noéji jam láa Diosdìh náahcannitdìh peéh chãjna, nihãt queét yeejépwãdìh pobyitjìh ãt mawap wat jĩ. Queét ï túut nuumát pínah niijnã, Noé queétdìh ãtìh bohénap wat yah jĩ. Obohjeéhtìh, ï jepahcatji jíib Dios queétdìh ãt

* 2:2 Jud 4 * 2:4 Jud 6

peéh chājap wut jī. Pánihna, Noéwādhijeh Dios ã táí ubuchah, queét ocho cāacwābitjeh ít táí yapap wut jī.* ⁶ Pánihat pah muntih, Sodoma tútchidih moón Gomorra tútchidih moondihbut peéh chājnit, iigátjīh át cáo beedánap wut jī. Pánih peéh chājna, túttimah jumnit yeejépwādhíbut ã peéh chājat pínahdih jéihyana át chājap wut jī.* ⁷ Obohjeéhtih, Lotdihjeh át táí ubap wut jī. Lot táini jumna, Sodoma tútchidih moón Dios ã wutadidih yap yohnit, tūbit yeejép ĩ chājachah enna, bádí át jīgahap wut jī.* ⁸ Caán táini Lot queét táicannitjeéh jumnit, yeó jáap jummat pah yeejép ĩ chājachah ennit, yeejép ĩ wéhenachah joinítbut, bádí át jīgahap wut jī. ⁹ Pánihna, Noéji, Lotjidihbut Dios ã táí ubatjidih náhnina, buu láabut bíic yoobó ã táí ubat pínahdih jwī jéihna caá. Āihwā yeejép ĩ yapachah ennit, jwī Maáh queétdih ã táí teo wáacbipna caá. Yeejépwāboodih nemat tólih panhipboó nemnit, peéh chājna caá ã chājap. Péeni yeó jáapdih, queét ã nemnitjidih iiguípna ã yoób yohbipna caá. ¹⁰ Bitá yeejépwā ĩ en ñinahat pahjeh chājnit, Diosdih yap yohnitdih chah ã peéh chājibipna caá. Páant yeejép chājnit, ñijeéh jumnit yeebdih yee bohénit ĩ jumna caá. Pánih jumnit, úumcan, tíccan, “Bitá chah wā jéihna caá”, nij jenah joinít caá. Pánih jumna, ángelwādhí yeejép ĩpī naóhna caá.* ¹¹ Obohjeéhtih, ángelwāboó queét yee bohénit chah wēpnit jumna yuhna, Dios ã pebh ñuhnit, táicannit ángelwādhí ĩpī naóh yaccan caá.*

* **2:5** Gn 6.1-7.24; 8.18; 2P 3.6 * **2:6** Gn 19.24; Jud 7 * **2:7** Gn 19.1-16,29 * **2:10** Jud 8 * **2:11** Jud 9

¹² Queét yee bohénitboó nuñúpwã dée pah jenah joicánnit ï jumna caá. Jiaboó jwĩpĩ bid juí maonit panihnit ï jumna caá. Jenah joicán, ï náahat pahjeh ï chãjna caá. ï jéihcannitdih deohnit, yeejép ï wéhena caá. Páant ï jumuchah, nuñúpwãdih jwĩ mawat pahjeh mantih, Dios queétdih iiguípna ã yohbipna caá.* ¹³ Queét bitadid yeejép ï chãjatji jíib Dios queétdih ã peéh chãjbipna caá. Yeó jáapdih cáacwã queétdih ï enechah yuhna, tíccanjeh, búdí yeejép ipĩ wēi chãjna caá. Yeebjéh ñi túi wēi jeéméchah, queét yeejépwãbut waadní, ipĩ chãjat pah tíic náah jumnidih chãjna, ñi wēi jeémátdih ï yéejana caá.*

¹⁴ Yaáhdih en ñinahnit, ipĩ yeejép chãjínna caá. Páant ï chãjatdih ï jéih cádahcan caá. Pánih chãjnit, Dios naáwátdih túi jéihcannitdihbut yeejép ï chãjat túutna caá. Bíí déedih tubit bidnit ï jumna caá. Páant ï jummat jíib, Dios queétdih búdí ã peéh chãjbipna caá. ¹⁵ Pánih túini namádih cádahnit, déhenit panihnit biáboó bejna caá ï chãjap. Balaam ã chãjatji pah queétdih ï chãjna caá. Balaam, Beor wūúh át jumap wut jĩ. Búdí jíib náahnit, yéej chãjadid át bejep wut yuh jĩ. ¹⁶ Páant ã yéej chãjíchah ennit, áih burro caandih át jũihñap wut jĩ. Caán wéhecanni ã jumuchah yuhna, Dios caandih át wéheat túutap wut jĩ, ã mínahdih ã jũihñat pínah niijná. Páant ã jũihñuchah joiná, Balaam yéej chãjadid ã bejatdih át cádahap wut jĩ.*

¹⁷ Queét yeenitboó meo waócáh mac wihcanni panihni ï jumna caá. Meo mac wihcanni pah jumnit, dedé pínah nihcan caá. Pánihat pah

* **2:12** Jud 10 * **2:13** Jud 12 * **2:16** Nm 22.4-35; 31.16; Jud 11; Ap 2.14

muntih, mah tólihdih johlit ã ub joh bojochah, mah ã buugcát pah, queét yee bohénitbut cãacwãdih teo wáaccan, dedé pínah nihcan caá. Pánihna, queétdih peéh chãjnit, tubit dupúnapboó Dios ã bejat túutbipna caá.* ¹⁸ Queét jéihnit pah cãacwãdih ã bohénachah yuhna, ã bohéát dedé pínah nihcan caá. Nin pah ã niij bohéna yuh caá: “Jwĩ náahat pah jwĩ chãjachah, ã túina caá”, ã niij bohéna caá. Páant niijná, Jesúsdi h jáap jepahnit, ã yéejatdih cádahnitboodíh ã jwúub yeejép chãjat túutíhna caá. ¹⁹ Queétdih nin pah ã niij yee bohéna caá: “Dedé wúatdih jepahat jwiútdih ã náahcan caá. Jwĩ weñat pínahdihjeh jwĩ chãjachah, ã túina caá”, ã niij yee bohéna yuh caá. Páant niij bohénit, yeejép chãjatdih cádahíhcan, caandíh ã jéih cádahcan caá. Pánih yeejép chãjna, queétjeh ã míic yéejana caá. Pánihna, ã yéejat ã maáh panihni ã jumna caá.* ²⁰ Queét yee bohénitboó jwĩ Maáh Jesucristo jwiútdih túi ubnidih jepahnit, nin baácdih moón yeejép ã chãjatdih ít cádahjip ta yuh caá. Obohjeéhtih, páant ã cádahat túttimah, jwúub yeejép chãjna, Cristodih ã jepahat pínah jãtih ã jumatji chah yeejép pohba ã chãjna caá.* ²¹ Pánih chãjnit, túini namádih ã waadcáh, chah queétdih ãta túi tagaá. Caán namádih waadát túttimah, tac púud biáboó bejat pah, Jesúsdi h ã cádahachah, chah ã túican caá. Pánihna, Dios túini ã wúatdih jepahna yuhna, caandíh cádahnit, jwúub yeejép ã chãjachah, chah yeejép caá. ²² Pánih túut nuumná yuhna, jwúub yéej chãjna, jwiútdih cãacwã nin jwĩ niiját pahjeh tigaá queét yee bohénit ã

* **2:17** Jud 12-13 * **2:19** Jn 8.34; Ro 6.6,16 * **2:20** Mt 12.45; Lc 11.26

chãjap: “Mũjjió ã éegnijidih ãpĩ jwúub jeémpna caá. Mũudih ĩ chocat túttimah, yeejép bepédih ãpĩ jwúub túpána caá, páant mũntih”, jwĩpĩ niijná caá.*

3

Cristo nin baácboó ã jwúub dei jũúwát pínah

¹ Wã oinitá, jãtih yeebdíh biíc núo wãát daác wahap jĩ. Pánihna, nin núodih yeebdíh mũũ wã jwúub daác wahna caá, páant mũntih. Con láa wã daacátji pahjeh, mũũ láabut biíc yoobó yeebdíh wã náhnat túutna caá, yee bohéatdih joicán, yoobópdiħ ñi jéihyat pínah niijná. ² Dios naáwátđih naóh yapanit ĩ naóh daacátđidih, jwĩ Maáh Jesucristo jwiútdih túi mũbni ã wútatđidihbũt ñi túi náhninaá. Á wútatđih jwiúit ã naáwát túutnit yeebdíh jwĩ bohénap jĩ.

³ Nindih ñi túi náhninaá: Péeni yeó jáapna dawá yeejépdih ñinahnit, Jesúh doonáđih túbit deoh naóhñit ĩ jũmbipna caá.* ⁴ Nin pah ĩ niúj deoh naóhbipna caá: “ ‘Wã jwúub dei jũóhbipna caá’, Jesús ã niijíchah yũhna, ¿dépanih tigaá ã jíghcan? Á jwúub dei jũóhcan niút. Nin baác ã jwiuh jumat túttimah, jwĩ mũowãji ĩ wũnat túttimah, niħat biíc yoobó páantjeh ã jũmna caá”, ĩ niijbípna caá.*

⁵ Páant niúj deohna, nindih ĩ náhnican caá: Dios ã wútatđih nin baácđih, jeáđihbũt át chãjap wũt jĩ. Nin baác mahjeh ã jũmũchah, caandíh át wáac juyát túutũp wũt jĩ, baác ã jíghat pínah niijná.*

⁶ Pánihat túttimah, pobytđih nin baácđih moondíh át yoh beedánap wũt jĩ.* ⁷ Pánih chãjna, iigátđih ã

* **2:22** Pr 26.11 * **3:3** 2Ti 3.1-5; Jud 18 * **3:4** Ex 12.22 * **3:5**

Gn 1.6-9; Sal 24.2 * **3:6** Gn 7.11

yoh beedáát pínah játih, ã wətatjĩh muntih Dios jeádih, nin baácđihbət ã wap jwəhna caá. Péeni yeó jáapđih, caandíh náahcannitđih peéh chājnit, jeádih, nin baácđihbət iigátjĩh ã yoh beedábipna caá. Pániđ peéh chājna, queéđđih iiguípna ã yohbipna caá.

⁸ Wã oinitá, nindihbət ñi túi náhninaá: “Mil jópchi maatápđih caá”, jwiít jwĩ niij jenah joyóchah yəhna, Diosboó ã enechah, biíc yeó jáap pahjeh caá. “Biíc yeó jáap bahnijeh caá”, jwĩ niij jenah joyóchah yəhna, Dios ã enechah, mil jópchi pah ã jumna caá.* ⁹ Jwĩ Maáđđih biquína nin pah ĩ niij jenah joiná yəh caá: “Dios ã niijátji pah chājat túut niijná, maatápđih ã pǎina caá”, ĩ niijná yəh caá. Obohjeéhtih, pániđcan caá. Căacwăđđih túi ăbíhna, caandíh ĩ jepahat pínahđih pǎi jwəhna caá ã chājap. Biíc căacđđih iiguípna ã yohiđcan caá. Nihat căacwă ĩ yéejatđih jĭgahnit, túiniboodíh ĩ túut nuumát pínahđih ã náah yacna caá.*

¹⁰ Obohjeéhtih, nuumní căac muú mínah ã náhnicah, nuumáđđih ã waadát pahjeh, jwiítboó jwĩ náhnicah, Cristo nin baácboó ã jwúub dei jūóhbiđna caá. Páant ã jūúwăchah, búđi yáanit, jeáboó ã buđđáh bejbipna caá. Caánboó jumnit cáiwă, widh, yeobút ĩ iig beedáh bejbipna caá. Nin baác, nihat ninboó jumni, căacwăbət ĩ iig beedáh bejbipna caá.*

¹¹ Pániđna, “Nihat ã beedáh bejbipna caá”, Dios ã niijíchah joinít, yéejatđih cáđahnit, Dios ã náahat pahjeh chājat caá jwiítđih náahap. ¹² Jwĩ Maáh nin baácboó waicanjeh ã jwúub dei jūúwát pínahđih wēi

* **3:8** Sal 90.4 * **3:9** Ez 18.23; 33.11 * **3:10** Mt 24.43; Lc 12.39; 1Ts 5.2; Ap 16.15

páinit, táinijeh ñi chãjaá. Caán yeó jáapdih jeáboó jumni ã iíg beedáh bejbipna caá. ¹³ Obohjeéhtih, Dios ã niijátji pahjeh nihatdih ã túut numát pínahdih jwĩ wēi páina caá. Nihat ã iíg beedát túttimah, jáap jeá, jáap baác dihbut Dios ã chãjbipna caá. Caán jáap baácboó táí chãjnitjeh ã jumbipna caá.*

¹⁴ Pánihna, wã oinitá, Diosjeéh táí jumat túut niijná, jwĩ Maáh ã jwúb dei júwát pínahdih wēi páinit, ñi táí chãjaá.* ¹⁵ Maatápdih ã jíghochah ennit, nindih ñi náhninaá: Dawá caandíh jepahnitdih ã táí ubat pínah ã judh jwuhchah, queétdih ã pái jwuhna caá. Biíc yoobó jwĩ dée jwĩ oini Pablodih Dios ã jéihyanachah, yeebdíh át daác wahap tajĩ. ¹⁶ Páant míic caá Pablo Cristo ã jwúb dei júwát pínahdih naóhna, ãpĩ daác wahap. Biquí láana jwĩ beh joíca naáhdih ã daác wahna caá. Pánihna, Dios naáwát dih bita táí jéihcannit, jenah joicánnit, yee naóhna, Pablo ã daacát dih ã túut numjéhna caá. ã daacát yoobópdih ã jumachah yuhna, mácah ã jwúb naóhna caá. Dios naáwát dih ã daacni núonajidihbut páantjeh mun tigaá ã chãjap. Páant ã chãjat jíib, Dios queétdih peéh chãjnit, iigúipna ã yohbipna caá.

ã pée naáwát

¹⁷ Pánihna, wã oinitá, nihatdih páant ã yapat pínahdih yeebdíh wã naáwáchah jéihna, ñi táí chãjaá. Yeejépwã yeebdíh mácah ã bohénachah yuhna, Cristoíh doonádih cádahcat túut niijná, queétdih ñi joicá bojoó. ¹⁸ Jwĩ Maáh Jesucristo

* **3:13** Is 65.17; 66.22; Ap 21.1

* **3:14** Jud 24-25

jwiít dih tá i ubnidih chah ñi tá i jenah joyoó.
“Weemdí h bádí oinit, ã tá i teo wáacbi pna caá”,
ñi nií j ná h ninaá. Yeó jáap jumat pah “Meém tá ini,
chah wēpni caá ma jumap”, jwí nií j wēi naó h jí h.
Páant tí i ã jumá nah.

Páant bóojeh tigaá wã naáwát.

Pedro

Dios ã jáap naáwát tólih New Testament in Cacua

copyright © 2008 Wycliffe Bible Translators, Inc.

Language: Cacua

Translation by: Wycliffe Bible Translators, Inc.

Copyright Information

© 2008, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Cacua

© 2008, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-08-06

PDF generated using Haiola and XeLaTeX on 21 Feb 2024 from source files
dated 29 Jan 2022
34c9543b-57a6-5290-ab7b-4fa15529a7e2